

---

## “ИПАК ЙЎЛИ ДУРДОНАСИ” XIV ТОШКЕНТ ХАЛҚАРО КИНОФЕСТИВАЛИ ДОИРАСИДА ФАРҒОНАДА ҚОЗОҒИСТОН ҲАМДА БЕЛАРУСЬ КИНО КУНЛАРИ ТАШКИЛ ЭТИЛАДИ

Мамлакатимизда 13-18 сентябрь кунлари бўлиб ўтадиган “Ипак йўли дурдонаси” XIV Тошкент халқаро кинофестивали доирасида Фарғона вилоятида ҳам “Тинчлик, тараққиёт ва маърифат” шиори остида “Хорижий мамлакатлар кино кунлари” ташкил этилади.

Кинофестивал тадбирлари олдидан “Кино беш кунда” II ёш киноижодкорлар танлови учун вилоятимизда, хусусан, Қўқон, Марғилон шаҳарлари ҳамда Риштон туманида қисқа метражли фильмлар суратга олинади.

16-17 сентябрь кунлари Фарғона шаҳридаги Ислом Каримов номидаги вилоят театр ва концерт саройида “Беларусь кино кунлари”, Қўқон шаҳар мусиқали драма театрида эса “Қозоғистон кино кунлари” бўлиб ўтади. Уларда “Беларусьфилм” раҳбари Владимир Карачевский, Шакен Айманов номидаги “Казахфильм” бош директори Акан Сатаев, беларуссиялик ва қозоғистонлик машҳур актёр ва актрисалар, Тошкент шаҳридан келган таниқли киноижодкорлар иштироки кутилмоқда.

Шунингдек, вилоят ва шаҳар ҳокимлиги, Кинематография агентлиги вилоят бўлими билан биргаликда Фарғона шаҳрида жойлашган Алишер Навоий кинотеатрида айна кунларда амалга оширилаётган қурилиш-таъмирлаш ва жиҳозлаш ишлари якунланиб, “ШХТ мамлакатлари кино ҳафталиги” доирасида фойдаланишга топшириш маросимини ўтказиш ҳам режалаштирилган. Мутасаддилар маълумотига кўра, кинотеатрда иккита 250 ўринли кинозал тўлиқ таъмирланиб, замонавий DSP форматдаги киноқурилма ўрнатилди. Натижада 1958 йилда қуриб битказилган, бироқ бир неча йилдан буён таъмирталаб ётган ушбу манзил фарғоналик киносеварлар учун яна ўз эшикларини очди.

Кинофестивал доирасида “Кинокарвон” акцияси ўтказилиб, хорижий фильмлар намойиши ва тақдиротлари, хорижий мамлакатлар киноюлдузлари билан қизиқарли учрашувлар, меҳмонларни вилоятимизнинг диққатга сазовор жойларига саёҳатлари амалга оширилади.

[Бизни ижтимоий тармоқларда кузатинг Facebook, Telegram, Facebook, YouTube, Instagram](#)

2022-09-10 14:43:12